

新元史

列傳

第一至第四

第叁拾冊

列傳第一

新元史卷之一百四

賜進士出身日講起居注官翰林院侍讀國史館纂修膠州柯劭忞撰

后妃

蒙古因突厥回鶻舊俗汗之妻曰可敦貴妾亦曰可敦以中國文字譯之皆稱皇后其庶妾則稱妃子終元之世後宮位號祇皇后妃子二等世祖至元十年以魏初建議授察必皇后冊寶用漢禮冊皇后自此始是爲正宮皇后其餘雖稱皇后無冊封之禮焉今博采前聞爲后妃傳其母以子貴爲皇太后者並列於篇

烈祖宣懿皇后

太祖光獻翼聖

皇后忽魯渾皇后以下附

太祖忽蘭皇后古兒八速皇后以下附

太祖也遂皇后

察合皇后以下附

太祖也速干皇后合答安皇后以下附

太祖完顏皇后

太宗孛剌合真皇后昂灰二皇后以下附

太宗昭慈皇后

定宗欽淑皇后

拖雷妃顯懿莊

聖皇后

憲宗貞節皇后也速兒皇后以下附

世祖帖古倫皇

后

世祖昭睿順聖皇后喃必皇后以下附

眞金太子妃徽仁裕聖皇后

成宗貞慈靜懿皇后

成宗卜魯罕皇

后

忽帖泥
皇后

荅刺麻八刺元妃昭獻元聖皇后

武宗宣慈惠聖皇后

速哥失理皇
后以下附

武宗伯忽篤皇

后

武宗仁獻章聖皇后

武宗文獻昭聖

皇后

仁宗莊懿慈聖皇后

答里麻失
里皇后

英宗莊靜懿聖

甘皇后

牙八忽都魯
皇后以下附

甘刺麻元妃宣懿淑聖皇后

泰定帝八不罕皇后

亦憐真皇后以下附

明宗八不沙皇

后

明宗真裕徽聖皇后

按出罕皇后以下附

文宗不答失里

皇后

甯宗答里忒迷失皇后

惠宗答納失里

皇后

惠宗伯顏忽都皇后

惠宗完者忽都

皇后

木納失里皇后以下附

附諸公主

烈祖宣懿皇后幹勒忽訥氏諱訶額倫先爲蔑兒乞部人也客赤列都所娶也客赤列都御后行至幹難河烈祖出獵見后美與族人捏坤太石答里幹赤斤共劫之后使也客赤列都策馬疾走烈祖追不及以后歸遂納焉生四子爲太祖及合撒兒哈準幹赤斤一女爲帖木倫公主烈祖崩太祖方十三歲同族欺其母子寡弱一日俺巴孩之二妻曰幹兒伯曰莎合台春祭飲族人酒后後至分膳不及后怒曰也速該雖死我子甯慮不成人今膳肉獨不我與他日且棄我矣幹兒伯莎合台亦怒明日徙帳去與后母子絕是時烈祖部眾皆叛去后

騎而追之持旄纛以麾叛眾還其大半太祖旣長娶光獻皇后孛兒台也客赤列都之兄蔑兒乞部長脫黑脫阿欲爲其弟復仇率三部蔑兒乞之眾來襲后率太祖等騎馬入不兒罕山使光獻皇后駕牛車從之爲蔑兒乞人所掠脫黑脫阿曰昔也速該奪吾弟之妻今吾亦奪其子婦可以相報矣始解圍而去及札木合與泰亦赤兀等部以三萬人來攻太祖分所部爲十三翼以拒之后率幹勒忽訥人爲第一翼戰於答蘭版朱思之地太祖卽皇帝位尊爲太后分部眾萬人與之后意不足二年巫者闊闊出譖合撒兒於太祖太祖惑其言執合

撒兒將殺之后聞之駕白駝車馳至太祖帳中盛怒譙責太祖太祖惶恐謝罪然卒奪合撒兒部眾后鬱鬱不樂未幾崩至元三年定廟制世次追上尊諡祔列祖爲太廟第一室

太祖光獻翼聖皇后孛思忽兒宏吉剌氏諱孛兒台與訶額倫太后同宗異族祖曰達而罕父曰特因又稱爲特薛禪太祖九歲烈祖挈往舅家欲爲之乞昏道遇特貌禪奇太祖狀貌又夜夢白海青挾日月而飛集其掌心喜爲吉徵乃要烈祖至其家以后字焉烈祖返留太祖爲贅婿及將崩始命蒙力克召太祖歸太祖旣娶后

蔑兒乞人來襲太后有媼曰豁阿黑臣聞車馬聲殷地
疾告太后太后與諸子及博兒朮者勒蔑各騎一馬入
不兒罕山后無馬豁阿黑臣乘以花牛車中道軸折爲
蔑兒乞人所獲太祖乃乞師於王罕及札木合盡虜蔑
兒乞部眾后及豁阿黑臣遇太祖於亂兵中控其馬韁
遂與太祖同返太祖與札木合自幼爲俺答至是益德
之同牧於豁兒豁納黑主不兒歲餘札木合意叵測后
勸太祖避之事具札木合傳太祖稱尊號巫者闕闕出
笞辱皇弟斡赤斤泣告於太祖后聞之愀然曰汗在而
小臣橫恣如是儻百年後其能畏憚汗之子孫乎太祖

乃命幹赤斤拉殺闊闊出后明識善斷能持大體尤爲
太祖所重生四子曰朮赤察合台太宗拖雷五女曰火
臣別吉扯扯亦堅阿刺海別吉禿滿倫阿兒塔隆至元
二年追諡光獻皇后祔太祖廟至大二年加諡光獻翼
聖皇后后守第一幹兒朵次后者曰忽魯渾皇后闊里
傑擔皇后脫忽思皇后帖木倫皇后亦憐真八剌皇后
不顏忽禿皇后忽勝海妃子

太祖忽蘭皇后兀洼思蔑兒乞部長荅亦兒兀孫之女
也荅亦兒兀孫從乃蠻太陽汗與太祖戰於納忽山太
陽罕敗死荅亦兒兀孫大懼請降將納女於太祖太祖

使裨將納牙逆之阻於兵納牙周慎止后途中三日太祖疑納牙有私欲罪之后力自陳旣幸知其不欺由是益重納牙后有寵太祖征西域獨以后從生一子曰闊列堅以母故視如嫡子后守第二幹兒朵次后者曰古兒八速皇后本乃蠻亦難察汗之妻太陽汗之後母也乃蠻敗爲太祖所獲依蒙古禮納之有寵曰亦乞列眞皇后曰脫忽思皇后曰也眞妃子也里忽禿妃子察眞妃子哈喇眞妃子氏族皆佚又有乃蠻女失其名生子朮兒徹早卒

太祖也遂皇后塔塔兒也客扯連之女太祖滅四部塔

塔兒先得其妹也速干有寵因言有姊尤美新嫁不知
流落何地太祖曰若得汝姊汝能爲之下乎也速干允
之時也遂與其婿匿於林中太祖搜獲之也速干果讓
姊而居其次一日太祖譙軍中也遂侍忽顧而歎息太
祖覺有異命在會者各退就所部而立最後一少年倉
皇不知所適詰之乃也遂前夫也太祖命斬之而寵也
遂如故太祖將征西域也遂請曰兵凶戰危汗出師萬
里諸子皆不在側儻一旦不諱誰當爲嗣願以告部眾
太祖大驚曰此大事微汝言吾幾忘之由是始定立太
宗後從征西夏太祖出獵墮馬因不豫也遂與近侍脫

欒扯兒必力勸班師太祖雖不用其言而心以爲忠旣滅西夏盡以俘虜賜之后守第三斡兒朵次日忽魯哈刺皇后曰阿失侖皇后曰禿兒哈刺皇后氏族均佚曰察合皇后嵬名氏西夏主李安全之女太祖伐西夏圍中與府安全獻女乞和曰阿昔迷失皇后曰完者都皇后曰渾都魯歹妃子曰忽魯灰妃子曰刺伯妃子氏族均佚初太祖滅塔塔兒有小兒兄弟二人曰忽里曰哈喇蒙都爲太祖所收養及稍長也遂言於太祖請使忽里兄弟收塔塔兒之餘眾得千人也遂有弟曰胡土虎爲右翼千戶胡土虎之弟生女曰奴忽丹爲諸王阿八

哈妃

太祖也速干皇后也遂皇后之妹生一子曰察兀兒早卒守第四斡兒朵次日忽答罕皇后氏族佚曰合答安皇后速勒遜都氏功臣赤老溫之妹太祖爲泰亦兀赤人所獲脫走至赤老溫家后匿太祖於羊毛車中追者至欲搜車后曰天暑如此羊毛中能匿人乎吾與汝乃一家人顧疑我如此追者乃去太祖滅泰亦兀赤其夫爲亂兵所殺后望見太祖亟呼帖木真救我太祖遽令釋之以舊恩納焉曰斡者忽兒皇后曰燕里皇后氏族均佚曰禿該妃子與朵列格捏均爲蔑兒乞部長脫黑

脫阿長子忽禿之妻太祖敗蔑兒乞虜禿該及朵列格
捏以朵列格捏賜太宗而自納禿該曰完者妃子曰金
蓮妃子曰完台妃子曰奴倫妃子曰卯真妃子氏族均
佚又有謨蓋皇后貝格林部長阿體耶訥赤之女無所
出太祖崩太宗甚禮重之察合台欲娶之太宗不與又
有肅良合妃子高麗人佚其名八不別及妃子佚其氏
族其所守幹兒朵均未詳

太祖公主皇后完顏氏金衛紹王女也太祖圍燕京金
宣宗納女請和太祖命阿剌淺使於金金諸帝女未嫁
者七人后最秀慧宮中稱爲小姐姐宣宗封爲岐國公

主以遣嫁焉引見阿剌淺卽拜后於階下又請后北鄉拜后不敢拒於是金人使丞相完顏福興送后至太祖營并媵護駕將十人細軍百人童男女各五百人采繡衣三千襲馬三千匹金寶稱是后母欽聖夫人袁氏亦從之太祖以其爲貴主禮重之國人呼爲公主皇后太祖於四斡兒朵之外又爲后建斡兒朵於斡兒洹水西邱處機至西域道過和林后與西夏公主各遣使送寒具等食后年甚高阿里不哥僭位和林時尚在焉
太宗孛剌合眞皇后次日昂灰二皇后氏族均佚太宗在潛邸以憲宗爲子命昂灰皇后撫育之次日忽帖尼

三皇后乞里吉思氏生二子曰闊端曰滅里憲宗二年
遷后於闊端所居地之西又有土拉起那妃子本蔑兒
乞部長答亦思兀妻太祖滅蔑兒乞以土拉起那賜太
宗

太宗昭慈皇后乃馬真氏諱朵列格捏號六皇后先爲
蔑兒乞部長脫黑脫阿長子忽禿妻太祖滅蔑兒乞以
后賜太宗生一子爲定宗太宗崩后稱制五年復歸政
於定宗而國事猶決於后事具本紀至元二年追上尊
諡祔太宗廟

定宗欽淑皇后斡兀立氏諱海迷失號三皇后定宗崩